

Reykjavík 9. desember 2020

Efni: Umsögn RAFMENNTAR um reglugerð um vinnustaðanám

Stjórn RAFMENNTAR lýsir yfir ánægju með ný drög að reglugerð um vinnustaðanám sem birtust til umsagnar á Samráðsgátt stjórnvalda 3. desember. Drögin veita fyrirheit um að nú verði loks hægt að halda betur utan um nemendur og umsýslu vinnustaðanáms með auknu samtali skóla, umsýsluaðila og atvinnulífs. Þetta aukna samstarf verður lykillinn að því að hæfni nemenda ná þeim viðmiðum sem sett eru fram í starfalýsingum og hæfnikröfum en það er mikið framfaraskref að nú eigi að miða við hæfni en ekki fjölda vikna.

Einnig er ánægjulegt að verkferli um rafræna ferilbók sé skýrt og vægi hennar skilgreint í utan um haldi þjálfunar. Þessar áherslur eru í samræmi við þær sem rafiðnaðurinn lagði upp með árið 2016 að frumkvæði Fræðsluskrifstofu rafiðnaðarins. Þessu ber því að fagna.

Eins og kemur fram í lögum um framhaldskóla nr. 92/2008 er allt nám á framhaldsskólastigi á ábyrgð skólanna. Hingað til hefur ákveðnum þáttum verið útvistað til umsýslu og framkvæmdar s.s. umsýslu með námssamningum. Fræðsluskrifstofa rafiðnaðarins, nú RAFMENNT, hefur séð um þessi atriði fyrir hönd skólanna fyrir vinnustaðanám í rafiðnaði. Gert er ráð fyrir í nýjum drögum að áframhald geti verið þar á og lýsir RAFMENNT sig reiðubúna til að vinna áfram í þessum mikilvægu málum. Þá er RAFMENNT auk þess tilbúið að leggja sitt af mörkum við þá endurskipulagningu sem þarf að eiga sér stað á kerfum og verkferlum.

Tvær leiðir varðandi vinnustaðanám eru nú tilgreindar í 5. og 6. grein umræddra draga. Ljóst er að mikil samvinna þarf þar að vera á milli skóla og rafverktaka um laus pláss hjá iðnmeistara annars vegar og skóla hins vegar. Flækjustig getur aukist þegar þeir skólar sem bjóða uppá nám í rafiðnaði fara allir að leita leiða fyrir nemendur sína að útvega þeim nemapláss og því lýsir stjórn RAFMENNTAR sig hér með reiðubúna að vera umsýsluaðili, hafa milligöngu um og halda utan um þessi mikilvægu málefni f.h. rafiðnaðarins. Í stjórn RAFMENNTAR sitja fulltrúar bæði atvinnurekenda og launþega.

RAFMENNT hefur verið í góðu samstarfi við framhaldsskólana m.a. með því að halda út vef www.rafbok.is þar sem nánast allt námsefni sem notað er í rafiðngreinum er aðgengilegt nemendum að kostnaðarlausu. Þar hafa kennarar og stjórnendur rafdeilda skólanna átt stóran hlut í þróun og eftirfylgni með námsefni. Einnig hefur öllum nemendum sem hefja nám í rafiðngreinum verið afhent spjaldtölva til að auðvelda þeim aðgengi að námsefninu.

Það er ósk þeirra aðila sem standa að RAFMENNT að skólar í rafiðngreinum leiti því til RAFMENNTAR þar sem þar hefur mikil tenging verið til staðar allt frá stofnun Fræðsluskrifstofu rafiðnaðarins. Á skrifstofu RAFMENNTAR eru til staðar öll tæki og tól fyrir skilvirkt og gott utan um hald með námssamningum, vinnustöðum og nemendum. Starfsmenn hafa nú þegar þá þekkingu og tengsl sem þarf til að þessi vinna geti verið áfram nemendum til góðs.

RAFMENNT fagnar þessum drögum og lýsir sig reiðubúna að taka þátt í þeirri vinnu sem framundan er.

Stjórn RAFMENNTAR sem saman stendur af fulltrúum SART og RSÍ er þess fullviss að í þeirri vinnu sem fram undan er verði tekið á þeim málum sem út af standa. Passa þarf uppá að samkeppnishæfi fyrirtækja eða eftirspurn og verðmæti starfsmanna með fullgild réttindi skerðist ekki með þjöppun ódýrs vinnuafis á einstök fyrirtæki í skjóli skólasamninga. Einnig þarf að huga að kjaramálum nema, fjármögnun vinnustaðanámssjóðs og skýra vinnuferla samskipta allra aðila sem þurfa að koma að málinu nemum og fagreinum til heilla.